





FRUCTVS PACIS
XXII. CANDIDATI
QVI
MAGISTRI CREATI SVNT
MAGNIFICO ACADEMIAE
RECTORE

IO. FLORENTE RIVINO
PANDECTARVM PROFESSORE PVBLICO, ECCLESIAE
NVMBVURGENSIS ET WVRZENSIS CANONICO, ILLVSTRIS
ICTORVM COLLEGII ASSESSORE, HEREDITARIO DOMINO
in Neu-Muckershausen REL.

PRO CANCELLARIO
CHRISTIANO GOTTLIBIO
IOECHERO

DOCTORE THEOLOGO, HISTORIARVM PROFESSO-
RE PVBLICO MAIORIS PRINCIPVM COLLEGII SOCIO

ET
DECANO
AVGVST. FRID. MVLLERO
ORGANI ARISTOTELICI PROFESSORE MINORIS
PRINCIPVM COLLEGII SOCIO
CANTATI

A
FRID. MENZIO P.P.

L I P S I A E
LITERIS IO. CHRISTIANI LANGENHEMII.

26.
LXV.

1735, 19.

21X





Tia, quae cecini vates, optata Ca-

menis,

Nunc constant, Deus illa dedit, rin-

gente furore

Bellona ; Musae rident, Charites-

que pudice

Exultant tenerae planta, vocemque canorae

Attollunt; nihil at metuunt, montemque pererrant;

Trux fugit, et tristis Mauors, hastamque reponit,

Sic galea nudatque caput, gladiumque recingit,

A 2

Delu-

Delusus verbis Bellonae, et falsus, Iberae:
Iratus, durus, faber impiger adstat, iniquum
Tristis opus tractans, ensēque, hastamque refingens
Ingemit, atque acuit ferrum, quo vomere vertat
Rusticus infontem terram, lolio atque cruore
Deformem, effoetam, ruri spes omnis adempta
Quando fuit; senis et Rheni quando accola fugit,
Vitibus atque herbis variae cultorque Mosellae;
Atque Padi ripae ciues, Athesisque coloni
Deseruere pios Lares, araque, focoque
Rellictis, nudi, extorres, curaque pauentes:
Spes aluit miseros, spondent meliora propinqua:
Destituit causam Gallus; Medea laborat
Celtica, fraude potens, parili verum arte retusa
Excidit eximia spe, vastaque regna remitter:
Sic cecidisse nocet, mendax quum machina fallit:
Allobrox haeret dubius, pacemque requirit
Incertus regni veteris, cupidusque nouorum,
Perfidia metuens poenam, quam tardior ira,
Durior at, Nemesis, fero, certoque, rogabit.

Sic

Sic agitur melius Musis, spes alba refulget,
Omnis inest fructus paci, qua viuitur vni
Ingenio, quod non moritur, nec tangitur vmbra,
Solum quod semper viuit, nec vincitur aeuo.
Pax optata bonis, nostris pax reddita Musis:
Spes noua sic lucet, laetae luduntque Sorores
Germanam amplexae Diuam, quia Pacis amantes:
Assurgunt casti pueri, spectantque pudentes
Hac specie capti, totique replentur amore
Sacro doctrinae ingenuae, quo viribus auctis
Contendunt fortes studiis, animoque virili.
Carminis haec ratio est nostri, res digna calore
Est sacro, sed Musa faue, tua gloria curae est.
Vrbs non ampla situ, nec sulcus latior actus,
Dicta Ipsilla fuit Musis, quae lingua Deorum est;
Albia terra colit decus hoc, quod nomine magnum,
Numine diues habet, quo praestat pluribus vna:
Sanctius hac nihil est diuis, quae monte relicto
Descendunt, tiliisque petunt, per prata vagatae:
Cingunt trini amnes urbem, et pomoeria lambunt:

Inde roseta virent, pandunt per flumina ramos
Riuales salices, nidus vbi construit ales
Cantatrix, laudata viris, adamata Camenis:
Theffala dixeris haec Tempe, vel Olympica vera;
Perluit et Peneus, montis vocat incola Pliffam;
Pardulus hunc nutrit; limpha post crescit Eliftrae:
Officio facer ipse locus, facer vndique nidor
Praestringit nares, perspirat laurus adusta:
Satque fauet coelum, perflat diuiniore aura:
Omnia conspirant, nihil est non terfa voluptas:
Delphica sic pubes propero aduolat vndique cursu
Lata pio studio, ducti sunt Architheoro:
Rem faciunt sacram lacti, referentque coronam
Sacra de lauru plexam, Phoeboque dicatam.
Sed videas quales sint nostri: cura Mineruae
Haec prima est: pura et pia mens; virtute subacti
Mores sint sancti, sine fuce et crimine, veri;
Absit suspicio fraudis; sit candor in ore,
Quem gestus prodat seruato in fronte pudore:
Virgineus verbis noster, tener, atque pudicus:

Nil

Nil temere emittat dictum; nil non bene cultum:
Ornatumque habitus referat, nil fordibus atrum
Ostendet: neglecta decent, sed pallia munda,
Qui studet, vt placeat; virtus ornata decora est:
Sic Nymphae cupiant comtum; sic Pieridesque
Conducent Musae, Fratrique Patrique probabunt,
Laudantes habitum, formam, moresque venustos;
Atque piae rogitant vultus, nutusque benignos
Aduertant pueris, inspirent flamine sacro,
Et coelo tollant, repleant vt numine mentem.
DI pietate noua moti, specieque decora,
Accedunt votis, curant hinc nomina scribi,
Heroasque iubent dici per secla futura,
Victuros fama, terra, coeloque canendos.
Conuocat et Coeli Rex maxima nomina Olympi,
Concilioque sedet medius, poscitque senatum
Doctorum, vt lectos lustrent, et cautio fiat,
Neu temere irrumpant, populus, vulgusque profanum,
Inficiantque sacrum coetum; neue ordine verso
Agmen conturbent veris tironibus auctum.

Aufcul-

Ausculant superi dictis, arcentque nefandam
Infestam plebis turbam, sine lege ruentem;
Atque decus seruant dignis, putresque repellunt:
Nullus honos numero est, virtus vbi sola putatur;
Census nil praestat; veteris nec imaginis vsus,
Si rude nil petitur; si non nisi pulcra ferentur,
Nil emitur precibus; nihil et conducitur aere,
Dum bona mens agitur, virtute et flexilis aetas:
Hanc superique colunt, nostri laudantque Catones,
Censores digni, diuino iure vocati.
Aeta placent superis, respondent Numina voce,
Excipiunt placidi iuuenes; Horaeque citatae
Imperium Phoebi accipiunt; Musaeque sorores
Nectare perfundunt laetos, sacroque calore
Incendunt animos, hyblaeo melle perungunt,
Dignos quos coelo faciant, terraeque futuros
Optatos, bene qui mereant virtutis amore.
Conspirant reliqui coeptis, operasque vicissim
Quisque suas reddet: partes sed Iupiter aequas
Distribuit, nutuque regit, coelumque gubernat:
Primus

Primus Apollo loco est, sacro qui corda replebit
Igne Deus, laurumque sacram, sua munera, tradet:
Urget opus Pallas magnum, cui sedula cura est
Mentis, quam castam format, doctamque remittit:
Orator coeli varius, sed nuncius orci
Dicendi leges reddit, linguamque volucrem
Fingit: sed dictis addit decus atque leporem
Ipsa Venus pellax, cuius caput omnia virtus:
Nec desunt Marti partes, sed robore pectus
Confirmat, duratque animum, quo ferre labores
Nil fugiant molles pueri, curasque viriles:
Altius assurgunt animo, sublime petentes
Reginae nutu coeli, quae fulmina tentat.
Sic alti redeunt coelo, doctique Magistri
Redduntur frugi terrae, quo premia digna
Concipiant virtute noua, meritisque decora,
De coelo laurus missa est, quae tempora cinget;
Plaudite sodales, eadem vos gloria spectat,
Et ducit virtus, aures adferte sequaces;

B

IOAN-

IOANNES GODFRIDVS SCHMYZERVS

CLEIDENENSIS

Cleidena in agro Lipsiensi est, et eius Pastor Ecclesiae Admodum Reuerendus Senex, M. Ioann. Sigism. Schmuzerus, qui filium ex Matre sustulit Ioanna Gertrude Cademania clo Io cc xv. d. XXVIII. Maii. Puerum, cum vno literarum amore captum cognosceret, Optumus Parens primis elementis ipse erudiuit; et inde M. Clementem, insignem formandis ingeniiis magistrum, in partes aduocauit; qui eo perduxit adolescentem, vt in scholam Grimmensem prouincialem iure possēt admitti; receptus in contubernium Musae alumnorum, doctrina profecit, Hauptii, Vlischi, Partschkii, et Ermelii, qui eundem in primis dilexit, quod beneficii insignis loco habet, et gratus praedicat: sed aegre triennium confecit in grato diuerticulo, quando aduersa valetudine pressus, sedem mittere coactus est, vt mutato coelo sanitati consulere: Numburgum ergo ab Optumo Parente ductus, praeceptoribus est traditus fides non minus, quam doctissimis viris, Schochero, et Stemlero; cuius etiam praesidio disputationem, praeter Scholae morem, publice defendit, qua Scholasticas Disputationes vindicauit. Vbi Numburgo abiit, ipsi gratulatus est, programmate edito Peucerus, de Philosophis *ἀνευ τῆ πρώττων μῆχρι τῆ λέγειν*. Lipsiam inde venit anno clo Io cc xxxii. quando fasces Boernerus tenuit, qui eundem inter ciues scripsit; et sic Mullerum Philosophum adiit, et per biennium, publice et priuatim docentem auscultauit; et cum Menzio disputando se se exercuit; et Physica Experimenta spectauit: Hebraeae linguae elementa Sanctius tradidit, cum Accentuum doctrina; sed Hebenstreitium publice Philologiam Sacram profestum audiuit,

diuit, et longius profecit. Theologiae sacra dogmata Pfeifferus exposuit, et Wollius, quibus Weiffius Polemica addit: Exegeticam acroamaticam, et criticam in sacros libros Wollius exercet: et Boernerum publice Theologiae locos docentem sectatus est, cui etiam, Sacrorum per Lutherum Emendationem, demonstranti, frequenter adest. Historiam Ecclesiasticam Deylingio debet, cuius etiam examimbus, et disputationibus interest: sed Oratoriae Sacrae praecpta a Wollio accipit.

IOANNES GODOFREDVS SIBERVS

LIPSIENSIS

Nihil frustra gloriati sunt Graeci veteres, si Athenis nati, et educati essent, quoniam exempla virtutis excitarent, ad parandam, bene agendo, gloriam: sed nec minor felicitas est patriam colere Lipsiam; et decus illustrius est, domi cominus videre, quorum vestigia pressisse proxima ad laudem via est: id obtigit Sibero nostro, senatoriae dignitatis Maioribus genito: natus namque est anno cLo Io ccxv. d. XV. Aprilis Patre Ioann. Georgio, prudentia, et dignitate Spectatissimo, Aedili Lipsiensi, et Templo ad D. Ioannis Praefecto: matrem habet Ioannem Margaretham, Godfrido Heinio, Senatore Francofurtano ad Viadrum, genitam, muliebri virtute, et rei familiaris prudentia, insigniter ornata: Literarum amore, cum teneri perspicerent filium, minime deterruerunt parentes, sed ut strenue percurreret, magis incitarunt: hinc de Praeceptoribus eligendis sedulo dispexerunt, quorum omnium monitis obsecutus puer est, et magistrorum industria profecit, donec Hebenstreitos, praeclaros ingeniorum formatores, Io. Christophorum,

B 2

nunc

nunc Archidiaconum Neostadiensem, et inde Io. Christianum, nunc Doctorem Theologum, et Linguae Hebraeae Professorem Publicum Lipsiensem, nactus est, qui publicis Academiae nostrae scholis praeparatum, idoneum reddiderunt, et qui publicis Doctorum praelectionibus adesset, quod grata memoria se retenturum, pius discipulus testatur. Sicque anno c1o Io cc xxxii. a Rectore Magnifico Christiano Friderico Boernero admissus, et in Album Academicum relatus est. In principio statim philosophiae se dedit, et Mullerum Professorem adiit, quem audiret; et cum Hoffmanno Doctore Logicam exercuit, et Iuris Naturae praeccepta excepit: inde Physicis demonstrationibus, et experimentis Menzii interfuit, quibus nunc et operam impendit: Non minimum vero Eloquentiae studio dedit, ideoque Kappium optimum ducem, publice, et priuatim docentem, sectatus est; cuius etiam praesidio ex publica cathedra, de Xicccone Polentono disputauit; et priuatim eius ductu disputando exercitatus est, et epistolam de Socratica disputandi methodo scripsit: Antiquitates Romanas Christus euoluit, quando Lium et Tacitum recensuit; Ad Ius Romanum quando propius accessit, Gebauerus Historiam praeciuit, et Pandectas explicauit, quarum etiam interpretem Reichelium Doctorem habuit. Historiae Germanicae, et Iuris Publici doctrinam Mascouio se debere profitetur: et Feustelius Historiam Regnorum enarrauit; Vernaculae etiam cultu, et eloquentia Schelhaferus formauit, qui etiam disputando praefuit.

IOANNES PETRVS NETTO

Lipsiae natus est anno c1o Io cc xiii. Petro Patre, qui curio est senior eorum, qui ephippia consuunt; matre Maria

Maria Elifabetha Hermannia, eidem curiae Praefecto Patre genita: Puer ingenuis artibus et litteris a Parentibus destinatus, priuatorum paedagogorum curae ad annum decimum quartum traditus est; et postquam eorum industria processisset, in Gymnasium Altenburgense missus, et ductu clarorum virorum, Gschwendii, Weberi, Sternii, Weiffii, et Moerlini, progressus fecit, quod gratus praedicat beneficium: sed Lipsiam, quadriennio exacto, reuersus, nomen professus inter ciues est, et Philosophiae operam dedit Gottschedio auctore, qui et Rhetoricam, et Poeticam docuit: inde Richterum adiit, qui Matheos lineolas duxit: Hausenius autem Physicam demonstrauit, experimentis additis: Eloquentiae praecepta Kappius dedit: et Ioacherus Historiam Germanicam enarravit: Hebraeae Linguae fundamenta Weiffius iecit, quibus Hebenstreitius instruxit; et Chaldaeae linguae elementa adiecit, et Accentuum regulas. Theologos audiuit Klausingium, et Pfeifferum: sed ab Deylingio prudentiae theologiae leges nunc accipit, cui etiam in examinibus priuatis respondet: Sacram Eloquentiam a M. Friderici discit: et sic satis instructus primam in Philosophia Lauream obtinuit anno proxime elapso.

ANDREAS POLYCARPVS LEYSERVS

MARTISBURGENSIS

Celebratum per vtramque ciuitatem nomen Leyserorum est: sed Theologis potissima debetur originis gloria; ad hos natales refert Andreas Polycarpus, qui Patri Polycarpo, Episcopatus Martisburgensis olim Superintendenti, anno dō Io ccxiii. d. XXIII. Novembr. natus est, ex Matre Augusta Dorothea gentis Bastinellerorum: a prima aetate destinatus fuit literis, ideo statim puer praeceptorum

rum industriae permiffus est, qui tenerum informarent animum, quanquam non minor Parentis cura fuit, quando per muneris ardui rationes licuit: primam operam Regis collocauit, et inde Oertelius: sed Optumo Patre orbatus est iam anno vigesimo quarto feculi, quo agimus, et Matris viduae curae vnice relictus; quae nulla re filio educando defuit: aduocauit ergo M. Wankelium, qui sedula opera eum curaret, quod ille tanta industria per biennium praestitit, vt gratias, nunquam morituras, ab discipulo meruerit, quanquam ipse fato iam intercidit: prudente pie Matris consilio, ita instructus, in Portense Lyceum dimiffus est, exceptus a Schrebero tunc Rectore; quem Freitagius secutus, eandem beniuolentiam, et curam, tironi adhibuit, quod non ingratus ipse in memoriam reuocat; nec Walthero, Schrammio, Stubelio, Hentschelio, Weidnero, Hubschio, et Bernio, successus in literis, partes denegat. Quinque annis amplius versatus in hac Musarum sede, et Lipsiam pertractus est; anno 1699 a Boernero Rectore ciuium insertus numero; et Mullerum, Philosophiam docentem inuenit, et eundem diligenter audiuit: sacrae Theologiae mysteria Hebenstreitius, Tellerus, et Weiffus filius, panderunt: Ioecherus vero, et Bayerus, vtramque Historiam explicarunt: et Sacrae Linguae cognitionem Hebenstreitius suggessit: vernaculae Eloquentiae fontes Gottschedus aperuit: cum quibus omnibus, et Gallicae et Italicae vsum sibi consciscit: ex merito primam Lauream Philosophorum ordo nuper contulit, ex quo publice, Praefide Marchio, Iurisprudentiam Pauli Ap. ad Gal. IV. l. disputando asseruit.

IOAN.

IOAN. GOTTFRIDVS HAVPTMANNVS

HAYNENSIS

Haynae Misnicae anno c^oIo cc xii. d. XIX. Octobr. natus, Patre Stannario: sed utroque parente infans orbatus est, et in familiam receptus ab Ioanne Adamo Meinerto, Amitae marito, qui filii loco puerum habuit, et educavit, adiutus ab Auunculo Io. Gottfrido Schaffio Mercatore haud incelebri, Urbis Consule, cuius in se merita memoria veneratur: Pueritiam transegit in patrio ludo, praceptoribus vsus, Camentio, Kaestnero, Foertschio, et in primis Hederichio, qui triennio de studiis meruit: priuatum vero patruelis sui Io. Georgii Hauptmanni operam expertus est ad literarum incrementum: exacta pueritia in illustre Musarum sacarium Portense, anno c^oIo cc xxvii, abiit, et insignes Doctores reperit, Bernium, Schmidium, Hubschium, Weidnerum, Hentschelium, Stubelium, Schrammium, Besserum, Waltherum, Schreberum, et, cui in primis debet, Freitagium: sed exacto tirocinio in hoc delubro, Lipsiam contendit anno c^oIo cc xxxiii. et Rectori Lehmanno nomen dedit, quod in ciuium Album scriberet, quo impetrato, ad Philosophiam animum conuertit, et Mullerum audiuit: humanarum literarum cultum Kappius perfecit: Ciuili Historia Mascouio, et Ioechero se dedit, et Christio: sacrae vero Theologiae studio Boernerum, Deylingium et Kortholdum, auctores habuit: Poeticam vernaculam Gottschedus docuit: Linguam Hebraeam Clodius et Hebenstreitius tradiderunt: Theologiae arcana dogmata aperuerunt, primo loco Boernerus, qui maxime fuit; inde Klausingio adhaesit, et Deylingio, Pfeiffero, Weisio, et Wollio Theologis. Morum doctrinam, ex sacris legibus repetitam, Tellerus reddidit: et sacrorum Exe-
gesi

gesi Pfeifferus duxit; oratoriam artem Hofmannus exercuit; et disputando praefuerunt, Hebenstreitius, Menzius, Kappius, qui patrocinium potissimum indulget, quemque Praesidem elegit, quando publice de Laconifino ex cathedra disseruit: Literarum vero, quae humaniores faciunt, amore praecipue captus, Eloquentiae, Poeticae, et cultioribus linguis, operam impendit strenue.

GEORGIUS GOTTLIEB FEIGIUS

KREIBA SILESIVS

Silesia foecunda ingeniorum mater est, et inde originem Feigius trahit, quem Pater genuit Vir Admodum Reverendus M. Gottfried Feigius, Palaeo-Kreibensis Ecclesiae Pastor, ex Matre Anna Catharina, gentis Sutoriae; natus anno 1706 d. XII Nov. Dudum cognitum, et meritum in Ecclesiam clarum, Feigionem nomen in Silesia est, et nostri Avus Venerandus Senex per sex et triginta annorum seriem Kreibensi praefuit coetui, et inde Haynensi Circulo Senior datus est: Tritavi memoriam poeta monumento servavit, quod nunc exstat.

Inter Maiores Abauus Laurentius vnus

Virtute insignis ciuis, Goldberga beata,

Ter septem vidit partus; de semine vidit

Ducentosque suo, dum vita est florida, natos.

Patris praeceptis noster principio obediuit, et doctrinae elementa cepit; nec minus sua monita Maternus Avus, M. Sutorius, Pastor Altzenauiensis addidit: Sed Christianus Kallertus, Bayerus, et Meisnerus, iuuentutem inde rectius formarunt, vt in Goerlizenſe Athenaeum posset transferri, vbi Grosseri, Mylii, Mulleri, Euchleri legibus paruit, et luculentiorum doctrinam percepit, et Linguis, Graeca, et Latina, profectus fecit: Septennium ibi exegit, et satis praepa-

praeparatus Lipsiam contendit, anno c^{lo} Io cc xxxiv, et a Rectore Kappio iura ciuitatis obtinuit; sicque Philosophiae studio, Mullerum auctorem sectatus est: Theologiam vero omnem Pfeifferus tradidit; et Wollius Exegeti, Morum sacra doctrina, praefuit, et concionandi praecepta exposuit: Linguae Hebraeae rudimenta Sanckius fecit: Hertelius vero Lingua Graeca edocuit, et disputando exercuit.

ALBERTVS FRICKIUS

VLMENSIS

Vlma Sueuorum patria Frickii est, vbi in lucem editus anno c^{lo} Io cc xiv. XVIII. Septembr. Patre Maxime Reuerendo Ioanne Frickio, Ecclesiarum Vlmensium Antistite, in Summo Templo Vrbis Pastore, in Seminario Ecclesiastico S. Theol. Professore Ordinario, Confessorii Assessore, Gymnasii Scholarcha, et Illustris Reipublicae Protobibliothecario; Matre Maria Sophia Spengleria, nobilis, et antiquae stirpis: crescentibus annis puer datus est curae publicorum Gymnasii Doctorum, et domesticae informationi praeceptorum, qui nunc in agro Vlmensi Ecclesiae praesunt omnes, et olim adolescentiam rexerunt discipuli, eo quidem successu, vt anno aetatis decimo quinto Professoribus publice audiendis par esset, et non vereretur de Consensu Fidei Veterum Germanorum cum Augustana Confessione inter ipsa iubilaei solennia, perorare, et moderatore Dauide Stoelzolino, Con-Rectore et P.P. O. Gymnasii Classibus valedicere; ex quo ciuium albo Tubingensium etiam inscriptus est, et Gymnasii patrii legibus vixit, et literis, in primis ad humanitatem ducentibus, et Linguis, Graecae et Latinae, operam impendit; historiae
C etiam

etiam ciuili, et ecclesiasticae, Philosophiae, et Theologiae, industriae partem tribuit, ingeniumque disputando, et declamando, exercuit; sub praesidio etiam Ven. Patruī sui, Eliae Frickii, solenni ritu in conspectu Procerum de Satisfactione Christi, cum applausu disputauit: praeter hunc vero, Praeceptoribus auscultauit, Veelio, Algoeuero, Herrenssteinio, Weißenmaiero, Stoelzolino, et germano Fratri M. Io. Georgio Frickio, quos omnes veneratur, et gratias publice agit: omnium autem curam superauit Venerandi Parentis sedulitas, qua tempestiue, et blande, monendo, et frequente consuetudine docendo filium per literarum studium egit, et exemplo virtutis, ad praecleara quaeuis, incitauit, et sumtus conanti liberaliter suppeditauit: Triennio sic peracto, Ienam se conuertit, et a Pro-Rectore Kemmerichio ciuibus Academicis adscriptus est, et Philosophia, Philologia, ac Theologia Doctores audiuit, Walchium, Ruffium, Wuchererum, Zulichium, Buderum, Stollium, Tympium, Koelerum, a quibus nunquam longius discessit, sed etiam nunc magni aestumat, et merita dilaudat: venit postremum Lipsiam, Optimi Venerandi Parentis olim delictum, et per annos decem altricem; hicque priuatim, et publice, Boernerio, Kappio, Ioechero, Clodio, industrium se praestat auditorem. Sed his virtutibus maestum Philosophorum Ordo nuper prima Laurea decorauit, et dignissimum summis honoribus, nunc ornatum reddit.

CAROLVS FRIDERICVS IOECHERVS

LIPSIENSIS

Nunquam Lipsia deficiet ingeniis, quo vsque literis honores constabit: illa Ioecherum dedit, cuius Pater Wolf-

Wolfgangus Valentinus, Mercator olim, praematura morte adolescenti filio ereptus est: Matrem colit Barbaram Helenam, ex nobili gente Beckerfeldiana, Vratislavia ortam: puerum pii Parentes priuatis praeceptoribus colendum, tradiderunt: sed post Patris obitum, nec minor cura sedulae Matris fuit, in educando liberaliter filio, quod summa pietate ipse agnoscit et grata mente veneratur: sed in partes vocatus est Patruelis Ioecherus, Historiarum nunc inter nos Professor, cuius auctoritati partem profectuum tribuit Noster, et non sine fructu a consiliis eius se nunc pendere, profitetur: Sed cum domo, ex sinu amittendum, Optima Mater duceret, Porta proprium Musarum domicilium, praelata est, in quam adolescens diuerteret, bonum factum; praeceptores namque egregios nactus, qui animum virtutis lege subigerent, et literis replerent, Freitagium, et qui domo recepit, Schrammium, Stubelium, Hentschelium, Weidnerum et Hubschium, digna, quae laudentur nomina, qui in perpoliendo iuvene operam contulerunt: emensus est quinquennium, quando Lipsiam reuersus est, a Kappio Rectore nostris ciuibus adscriptus, et iuribus auctus; sicque Gottschedium salutauit, et Philosophiam docentem audiuit, et Ioecherum suum, Historiam enarrantem. Iurium vero interpretem Sigelium Doctorem sequitur: Gottschedio dicendi copiam reddenti assidet; et disputando cum eodem exercetur.

FRIDERIC. WILHELM. SCHLEVSNERVS

GLESINA MISNICVS

Patrem habuit M. Fridericum Wilhelmum, Ecclesiae Glesinensis Pastorem; Matrem Ittigiam, ex qua natus anno

C 2

1699.

clo 10 cc ix: sed vtroque Parente dudum orbatus est: et
 postquam domi primis literarum elementis eruditus fuit,
 in nostram Nicolaitanam admittus, idoneos praeceptores
 nactus est, Crellium, nunc ad coelestes euectum; Drechsle-
 rum, et Orlobium, qui cum laude scholae praesunt: an-
 no clo 10 cc xxvii. in Academiam prodiit, quo optimus
 Pater diem obiit extremum, et nouo studio decucurrit;
 quando Philosophiae studium aggressus est, Olearium se-
 cutus, et Mullerum, duces: et quia Theologiae sacris, in
 primis se deuouit, frequenter Schmidio assedit; et post
 fata huius, Klausingio et Pfeiffero: Hebraeam Linguam
 a Ludouici perdidit, cuius in se merita, et li-
 beralitatem amplissime dilaudat: Operam Carpzouio de-
 dit, quando Sacras Antiquitates enodauit: Exe-
 gesin sacrorum publice facientem Pfeifferum aufcultauit:
 Publice et ipse disputauit, M. Ludouici Praeside, de Mo-
 tu Spirituum.

CHRISTIANVS GOTTLIEB LVDWIGVS
 BREGENSIS SILESIVS

Natus anno clo 10 cc ix. XXX. Aprilis, Patrem colit Geor-
 gium, Sutorem; Matrem Annam Elifabetham Koerne-
 riam: amore literarum captus, in schola patria nutritus est,
 diligente cura, Musgii, Schindelii, Thilonis, et Winck-
 leri, qui omnes pariter meruerunt formando adolescen-
 tiam, et iuuentutem: Lipsiam venit anno clo 10 cc xxxix,
 quo Schmidius fasces Academicos tenuit, et hospitem in-
 ter eius recepit: Philosophia vniuersa Ioecherum audiuit:
 Physica Haufenium, et Menzium; Marhesi Richterum:
 Poetica vernacula, et Eloquentia, Gottschedius exercuit:
 publi-

publica disputatione virium periculum fecit, Praefide Hebenstreitio, nunc Physiologiae Medicae Professore, de Sensu externo Facultatum in Plantis Iudice. Quando Regio nutu, anno clō Io cc xxxi. Hebenstreitius in Africam ablegatus est, vt remotis longius terris, naturae opera et gentium mores, diligentius, et propius, perquireret, Ludwigius noster se comitem dedit longi, et dubii itineris; quo feliciter perfecto, cum Musis denuo in gratiam rediit, et serio ad Medicam Artem se conuertit, et Doctoribus frequenter adstitit; Platnero, Physiologiam, Anatomem, et Chirurgicam tractanti: Hebenstreitio suo, quando Physiologiam docuit, et Plantas legit: Quelmalzio, quando fecandi cadauera artem fecit: Plazio, vbi disputantibus praefedit: et Schachero, qui artis praxin demonstrauit: omnibus autem Waltherum patronum, et praeceptorem fidum expertus est: ab anno clō Io cc xxxiv. Syluersteiniano stipendio beator factus, alacriori animo rem medicam curauit, et beneficium in se collatum oratione, de Medicina Superstitionem debellante, laudauit; a suo etiam Ordine, post examen factum, Baccalauri iure decoratus est.

CHRISTIANVS FRIDERICVS HVHNIVS
LIPSIENSIS

Lipsia Huhnium dedit, et Pater Ioannes Godofredus mercaturam exercet; Rosina Elisabetha Geisleria in lucem edidit anno clō Io cc xxv. d. XIII. April. pietatis, et religionis femina parentes inspererunt puero sedula cura; et cum literis idoneum discendis agnoscerent, tradiderunt instituendum praecceptoribus priuatis, qui ad altiora ducerent, quosque operae non poenituit, quando

publicis muneribus praefecti sunt; nec discipulus grata memoria non recolit beneficium in se collatum: fatis vero, quae ad humanitatem ducunt, literas doctus, in publicum prodiit, et nomen professus est Academiae, ab Ludovici Rectore receptus, et ciuibus adscriptus, anno cło Io cccxxx. Philosophia Doctorem elegit Ioecherum, cui per biennium adhaesit: et quando ad Historiam se conuertit, eundem secutus est, vel literariam, vel ciuilem, enarrantem: Mathesin ab Hausenio didicit. Hebraeam Philologiam Hebenstreitius edocuit: Exegeti sacra Pfeifferus praeiuit, et Theologiae praecipuis partibus; quibus etiam Deylingium, Hebenstreitium, Tellerum, Wollium, Doctores, obtinuit: Pastoralis prudentiae praecepta Deylingius dictauit; Oratoria sacra Tellerus exercuit; et Boernerus exercitationes exegetico-Practicas instituit in classica dicta; cui etiam Reformationis Historiam publice repetenti, adstitit.

CHRISTOPH. GOTTHELFF MOLLERVS
FREIBERGENSIS

Freiberga, antiquum opus, olim Hermundurorum sedes, metallifodinis in primis diues, vndique celebrata, Mollerum dedit anno cło Io cc xl. d. ii. Aug. Patrem habuit M. Samuelem, Gymnasii Rectorem, virum praeclare doctum, et de literis, et iuuentute, egregie meritum; Mater est clara Elisabetha, Burgeriae gentis: Puer nondum Ephebus, ita priuatorum paedagogorum fidei creditus est, vt ipse Pater praeesset formando literis ingenio, qui et inde totum in se negotium conuertit, coniuncta quidem Collegarum in publico Lyceo, opera, quorum in se merita, Hassii in primis, et Lutheri, minime dissimulat discipulus: Non sine laude

laude diligentiae, Wilischiorum maxime beneuolentiam expertus, venit Lipsiam, a Rectore Klausingio exceptus, et ciuitatis literatae iure donatus anno cło Io cc xxxi. sicque Philosophiam proxime adiit, et Mullerum Doctorem elegit, quem sectaretur; et sacrae Hebraeae Linguae studio Weisius, Hebenstreitius praefuerunt: diuinæ scientiæ adyta, Klausingius, et Pfeifferus, aperuerunt: Boernerus, Deylingius, et Pfeifferus per Exegesin sacram duxerunt: Homiletica Friderici exercuit: Pastoralis officii præcepta Deylingius edidit: nunc in examinibus priuatis dicta repetit, et disputando virium periculum facit, mathematicis etiam deditus, ad quorum scientiam comparandum Richtero auctore vitur.

SALOMO ROLLIVS

QVEDLIMBURGENSIS

Patria ortus Quedlimburgo anno cło Io cc xii d. II. Iulii, Patre Christiano Friderico, qui choro tunc Musico praesuit Cantor per prouinciam; nunc Magdeburgum pro- uectus, eidem praefectus muneri: Mater Anna Sophia Krameria rei militari Praefecti filia est: cum in puero obser- uarent Parentes docile ingenium, et ad literas alacre, ipse Pater tenerum imbuit rudimentis, ad annum aetatis deci- mum: ab eo in gymnasium Magdeburgense transtulit ado- lescentem, et Magistris dedit doctrina claris, Meineckio; Lucae, nunc inter coelites; Mylio, nunc Rectori Branden- burgensi, Bergnero, nunc defuncto; Walthero, nunc Re- ctori; quorum omnium ita profecit industria, ut anno cło Io cc xxxiii. ad Lipsiensem adspirare non dubitaret, quo- ueniens a Rectore Lehmanno ius ciuium obtinuit; et ad Philo-

Philosophiae studium se proxume conuertens, Mullerum audiuit publice et priuatim: Physica Experimenta tentantem Lehmannum spectauit: Kappium Eloquentiae leges interpretatum obseruauit: Poeticam criticam Gottschedio debet. Linguae Sanctae praecepta Hebenstreitius explicauit; sed Clodius, et Friderici, auxerunt: inde ad Theologiam propius accessit, et Pfeifferum; Boernerum; Klaufringium, et Deylingium, per omnes sacrae doctrinae partes, auscultauit: quorum omnium sibi praestitam operam, pro beneficio habet.

IOANNES DIEDERICVS WINCKLERVS

HAMBURGENSIS

Hamburgum opulentissimum Germaniae emporium est, quod originem Wincklero dedit anno c^o l^o cc xi. xvii. Decembr. Maioribus Theologis magni nominis; Patrem colit Maxume Reuerendum Ioann. Fridericum ad D. Nicolai Pastorem, et Reuerendi Ministerii Seniore; Mater Dorothea Manckenia est: Paterno Auo Ioanni Wincklero insignibus in Ecclesiam meritis aeterna constabit memoria. Postquam domestici praeceptores adolescentem ex ludo dimiserunt, in Gymnasium Hamburgense anno c^o l^o cc xxix. progressus est a Rectore Io. Christiano Wolfio receptus, et Clarissimos Viros, Edzardium, Fabricium, Wolffium, Reimarum, Richeyum et Dornemannum, per Philosophiam, Historiam, Mathematicam, et Orientis Linguas, ducentes, secutus est; quorum publica, et priuata opera, eo profecit, vt anno c^o l^o cc xxxii. oratione publice dicta, Gymnasio valediceret, et Lipsiam pergere, non dubitaret: nomen literatae nostrae ciuitati tunc dedit, Rectore Boer-
nero

nero d. VI. Maii: complexi sunt benevolentia accedentem, quicumque bonam mentem amarent; et cum Philosophiam iterum adiret, Professores habuit, Mullerum, Menzium, Gottschedium: Theologiae partes, Klausingius, Deylingius, Tellerus interpretati sunt, Theticam, Polemicam, et Moralem; et in primis Tellerus oracula sacra interpretandi artem docuit; Deylingius etiam Prudentiae Pastoralis regulam suppeditavit. Ioechero Historiam uniuersam enarrantem, assedit: Ecclesiasticam uero, Boernerus et Deylingius, et Kortholdus reddiderunt: Ius Ecclesiasticum, quando Griebnerus, olim euoluit, eiusdem lectiones excepit. Hebenstreitius Orientalium Linguarum studium promouit, et Criticam Sacram Hofmannus praelegit: Klausingio et Kappio auctoribus, disputando contendit; et Schelhaferus Oratoriae artis praecepta dedit: In publicum prodiit anno 1699. et in templo Academiae ex cathedra solemnem orationem recitauit, de iis, quae circa festum Pentecostes memorabilia sunt, quae eodem anno, et iterum, secundis curis aucta, altero, typis edita est.

CHRISTIANVS FRIDERICVS SCHAVBIVS

LVCCENSIS OSTERLANDVS

Natus est anno 1699. XXIII. Febr. Patri Christiano, ex Matre Maria, gentis Baunackianae: ad aetatis annum duodecimum in schola patria literas didicit; inde ingressus Altenburgense Gymnasium, elegantioribus cultus est, et per octennium subsistit, et doctrinas hausit Weisii et Sternii, quos mors praeripuit; sed inde Moerlinum, Weberum, Gschwendium, praeceptores accepit, quorum

D

omnium

omnium in se praeclara merita commendat: At postquam oratione valedixit, Lipsiam commeavit, et Philosophis, Mullero, et Ioehero, et Birnbaumio se praebeuit; et ab Hofmanno Mathematicam perdidicit, prioribus Academicæ diligentiae annis: posterioribus vero, ex quatuor, quos transegit, Theologiae incubuit, et Pfeiffero, Tellero, Wollio adhaesit.

IOANNES THEODORVS GRADIVS

GEDANENSIS

Natales debet Maxime Reuerendo M. Danieli Gradio, Pastori Gedanensium ad aedem parochialem: Matrem habet Florentinam Virginiam, gentis Rebeschlianæ. Gedani natus cō Io cccxi. d. I. Martii, et diligente Parentum cura educatus est; literis ediscendis maturus, praeceptoribus scholæ Marianæ creditus, qui fundamenta iacerent, inter quos primo loco Kolbium Rectorem commendat, et plurimum ei tribuit, ex humaniorum literarum studio: anno cō Io cccxxv. in Gymnasium prouectus est publicum, et praeceptores accepit Abichtum Doctorem Theologum, tunc Rectorem, et ad S. S. Trin. Pastorem, nunc Wittenbergensem Professorem, et Superintendentem Generalem, quem etiam absentem Gradivus colit; Willenbergium, Kulum, Sartorium, Schelgwigium, Hoheiselim, Hanouium, et Lengnichium, quorum non minima pars iam ad plures abiit; sed per omnes ita Noster profecit, vt anno cō Io cccxxxii. satis ornatus Lipsiensem ingredi cum applausu posset, et a Klausingio civium numero adscribi; qui et domo hospitem suscepit et Theologiae Theses, et Polemicam docuit, et Morum ex sacrae doctrinae fonte praecepta

cepta dedit: Philosophiae sacra Menzius, et Gottschedius, recluserunt: Oratoria arte et Poetica Schellhaferus praeiuit: Historiam Ecclesiasticam Kortholdus enucleauit: Sanctarum vero Linguarum usum ab M. Hartensteinio comparauit: Exegeleos et Morum sacrorum praecepta Tellerus suggestit: Hofinanno etiam in scholis Criticis adfuit, qui idem eloquentiae sacrae capita exposuit, quam nunc exercet.

CAR. LVDOV. VOLLHARTVS
ZITTAVIENSIS

Patre natus est Ioanne Christiano, Doctore, qui medicinam Zittaviae, non minore felicitate, quam applausu facit; Matre Christiana Euphrosina Landsbergeria, Mercatoris olim Dresdensis, non incelebris, gnata: post prima literarum rudimenta peracta, scholam patriam ingressus est, et plenioram hausit doctrinam, quam in primis moderator eius Godofr. Polycarpus Mullerus, suppeditauit; nec ante loco discessit, quam Philosophiae omnes partes confecisset: sic anno cdo 10ccxxxiii. Lipsiam contendit, et quam Iurisprudentiae praecipue studio se dedisset, amorem humaniorum literarum tamen non deposuit: ideoque Magistros sibi duces in primis constituit, Griebnerum, Mascouium, Andr. Flor. Riinum, Gebauerum, Menzium, quibus procederet: sed priuata industria illa prae reliquis agit, quibus innato erga elegantiores Musas, amori indulgeat, et ingenium perpoliat.

IOANNES IOACHIMVS SCHWABIUS

MAGDEBURGENSIS

Magdeburgum Saxonum Metropolis, Archiepiscopalis olim sedes, nunc mercatura nobile emporium, Schwabio natalis est, Patre Ioanne, qui braxandi iure donatus, negotium exercuit: Mater est Anna Elisabetha Creutzbergia: puer in ludum literarum, in tempore dimissus est, atque a Diecmano, Stammero, Meinekio literis imbutus: sed postquam Patris obitus familiam afflixit, varie iactatus filius, in patrio tamen Gymnasio perstitit, nec a literis se abstinere passus est; domo exceptus a Cl. Meuschelio, ordinum ducatus Magdeburgensis Syndico, ubi praeceptorem habuit Ioann. Lucae, cuius memoria, post fata, ipsi sacra est. Brunswigam Meuschelius vocatus fuit, et Schwabius in contubernium admissus est Scharrowii Consulis filii, cum quo exegit quinquennium integrum: praeceptoribus autem usus est M. Bergnero, tunc Rectore; Walthero eius successore, cui plurimum debet; et qui in primis iuuenem dilexit, et ingenium percoluit, et re adiuuit, quod gratus testatur: Mylius, tunc Conrector fuit, qui primas Matheos lineas duxit: ita gnauiter agenti, datum est, ut programmate, vernacula scripto, ad solennem declamationem scholasticorum patronos inuitaret; inde tandem scholae patriae oratione valedixit, et Halam ire constituit; sed Lipsiam ante visurus, ibi, fato quasi ductus, haesit, et Klausingio anno c^{lo} l^o cc xxxiii. Rectori, nomen dedit, quod Albo ciuium infereret: post ad Mullerum festinauit, qui Philosophiam interpretatus est: sed Gottschedius eum singulari affectu profecutus est, et plenius edocuit, et Poesi, et Eloquentia finxit; et orationibus, et disputationibus exercitauit: Kappio Latinam Oratoriam

toriam elocuto etiam adfuit: a Sanctio Hebraeam Linguam didicit; et Menzio ad Hesiodum commentato, publice se praebuit; et Ioecherum, Historiam Clerici praelegentem, audiuit; ecclesiae fata et Historiam Kortholtus repetiit: nunc in primis Theologis se auditorem praestat assiduum, Boenero, Klausingio, Pfeiffero, Tellero, Sanctio: Per otium, inter operas, Swifti elegantem satiram in Poetas recentiores humi repentes ex anglica, in patriam linguam conuertit, et annotationibus illustrat, et exemplis nostrorum auxit.

SAMVEL ROTHER

VRATISLAVIENSIS

Patriam fortitus est Vratislaviam in Silesia literarum metropolin; natus anno dō 1600. Patrem habuit Samuelem Textorem; Mater est Anna Iuditha Wunschia; illo orbatu ab ineunte adolescentia, Matris pietatem, et sedulam curam, vberius expertus est; et cum literis eum destinasset, in ludum patrium ablegauit, per cuius omnia subsellia iret; quibus emensis, in Mariae Magdalenae Gymnasium prouectus est, et sub auspicio Clarorum Virorum progressus fecit, Thieleri, Galli, Thielischii, Lenterii, Thammii, Neumanni, Eberleinii, qui eum in primis dilexit, Gottwaldi; quorum in se merita omnium praedicat: sed ad altiora iam praeparatus, Rungium auscultauit, Kellerum, et Stieffium: Theologiam etiam delibauit, Teubnero Doctore: priuatam etiam elocarunt operam Leisnerus, et Iohnius, a quibus Linguae Sanctae praecepta didicit; et Lipsiam anno dō 1633. concessit, vbi a Rectore Klausingio iura ciuitatis literatae impetrauit, et ad Philosophiam animum conuertit, et Mullerum adiit eandem

praelegentem: per Theologiae vero dogmata Klausingius face duxit: In Hebraeae linguae studio Sankii; et Graecae Dresigii opera adiutus est: et quando Deylingius Theologus Pastoralis officii praecepta dedit, nunquam illi defuit. Tellerus vero officium christiani hominis, ex sacris fontibus deriuatum, exposuit: Oratoria Sacra Hoffmannus, et Wollius perfecerunt; et Pohlius Medicus disputando exercet Philosophia.

CAROLVS CHRISTIANVS BRIEGERVS

VRATISLAVIENSIS

Patriam nactus est Vratislauiam Silesiae emporium, bonae mentis altricem; Patrem Christianum Bartholomaeum, Mercatorem; cuius mortem eo acerbius luget, quo maior in educando filio cura fuit. Matre natus Rosina Elisabeta, Ieremiae Ottonis, Pastoris olim Goericensis filia, cuius omnibus votis respondere virtute strenue allaborat noster: puero priuatim praefecti sunt paedagogi, Wildfeuerus, Klippelius, et Wincklerus, a quibus in Elisabethanum Gymnasium dimissus est, Arletio, et Stephano, commendatus, quibus vterius progressus est, Teubneri, et Burgii legibus obsecutus: et altius haeret Kranzii memoria, cui plurimum se debere pius profitetur: nec minus Pohlio, et Deichselio, quorum illi Linguae Hebraeae cognitionem tribuit, et vberrimis laudibus extollit in se merita, et Raschii beneuolentiam praedicat: sed horum ope, et consilio Lipsiam emigravit auctus Illustris Senatus Vratislaviensis, et Mercatorum Tribus Seniorum munificentia: Lipsiae ciuibus adscriptus, Rectore Klausingio, tribus abinde annis. Philosophiam docentes Mullerum, et Gottschedium audiuit. Ioecherus Historiam Ciuilem reddidit: Lingua Hebraea Hebenstreitius,

tius, Keyfelizius, et Sanctius imbuerunt; Pfeifferus et Wollius sacram Theologiae doctrinam explicarunt: et Deylingius Pastoralis muneris praecepta dedit, et Historiam Ecclesiasticam suppeditauit, qua etiam Kortholtum auscultat: Exegeti sacra, Morali theologica, et Homilica, Tellerus praefuit. Matheos capita, et difficiles nodos Bosius, et Heinsius soluunt.

CONSTANTINVS FRIDERICVS MEISIVS

Natus Schleusingae Hennebergicae anno cō Io cc xv. die XV. Aprilis, Patre Summe Reverendo, Friderico Ernesto, Theologo, Consiliario Ecclesiastico, et Superintendente Schleusingensis dioeceseos, a priuatis praeceptoribus satis instructus in patrium Gymnasium receptus est, et ab infimis subfellis, per omnes classes ductus, ad summam ascendit, praeceptoribus, Gabizio, Walchio, et Schadio, qui rebus humanis exentus est; anno vero cō Io cc xxxii. a consistorio dignus iudicatus, vt ingrederetur Academiam, vbi Salanam praetulit, atque a Russo Doctore Hebraeam linguam didicit; Kromaierus stilum Linguae Latinae duxit; Historiam Literariam Stollus explicauit, Buderus omnem Historiam enarrauit; et Hallbauerus oratoriae praecepta dedit; Wideburgus Mathesi confirmauit, et omnem Philosophiam Reuschius absoluit, qui et priuatissima opera totam repetiit, et Theologiae omnes partes subiunxit: Inde Lipsiam concedere iussus est, et anno cō Io cc xxxv. appulit, et id in primis agit, vt priuata industria Schirschmidio duce Algebrae arcana penitus perquirat; nuper etiam ex cathedra publice disputauit, Ioecho Praefide, de discrimine, et vnione memoriae sensualis cum intellectuali.

CHRI-

CHRISTIANVS GOTTOFR. RICHTERVS

NEOSTADIENSIS MISNICVS

Patre genitus Adm. Reuerendo M. Georg. Gottofredo Richtero, Neostadiensium, et Grisbacensium Pastore; Matrem agnoscit Burgeriam, ex qua anno dno 1600. d. XXVII. Nouembr. natus est: Postquam domi primas literarum lineas domestici praeceptores duxerunt, Schnebergam, domo emissus est, vbi triennii spatio per subsellia ascendit, ab Hofmanno, et Dopperto, viris, praeclare, de literis, et iuuentute meritis, perductus, ita quidem vt prior, sanguine coniunctus, Orientis Linguarum cognitione imbueret; posterior omnis humanitatis adminicula supeditaret; quibus abunde instructus Wittenbergam properauit, et Theologiae studio se totum mancipauit, et Schroecerum, et Zeibigium, Doctores, frequenter adiit, et studiose auscultauit; sed neque Philosophiam intactam dimisit, verum Reinhardum, Baumeisterum, et in primis Crellium, audiuit docentes; et ipse dissertationem scripsit, de Signo Crucis ex Templis nostris non eliminando. Lipsiam venit, quo dignus Laurea iudicatus, ab incluto Philosophorum Ordine, summos honores, diligentiae et virtutis premium caperet, quod suo merito impetrauit.







Leipzig, Diss., 1735 A-Q

ULB Halle

3

004 758 757



Sb.

f

1078







26.
LXIV.

1735, 19.

FRUCTVS PACIS
XXII. CANDIDATI

QVI
MAGISTRI CREATI SVNT
MAGNIFICO ACADEMIAE

RECTORE

IO. FLORENTE RIVINO

PANDECTARVM PROFESSORE PVBLICO, ECCLESIAE
NVMBVURGENSIS ET WVRZENSIS CANONICO, ILLVSTRIS
ICTORVM COLLEGII ASSESSORE, HEREDITARIO DOMINO
in Neu-Muckershausen REL.

PROCANCELLARIO

CHRISTIANO GOTTLIBIO
IOECHERO

DOCTORE THEOLOGO, HISTORIARVM PROFESSO-
RE PVBLICO MAIORIS PRINCIPVM COLLEGII SOCIO

ET

DECANO

AVGVST. FRID. MVLLERO

ORGANI ARISTOTELICI PROFESSORE MINORIS
PRINCIPVM COLLEGII SOCIO

CANTATI

A

FRID. MENZIO P.P.

LIPSIAE

LITERIS IO. CHRISTIANI LANGENHEMIL.

21X